

PRAVILA PRIVATNOSTI

1. Uvod

Cilj Pravila privatnosti Ministarstva unutrašnjih poslova Kantona Sarajevo (u daljem tekstu: Ministarstvo) je da u skladu sa članom 68. Zakona o zaštiti ličnih podataka („Službeni glasnik BiH“, broj: 12/25) (u daljem tekstu: Zakon), svim licima čije lične podatke Ministarstvo obrađuje u okviru postupaka koje provodi, uz izuzetke propisane posebnim zakonom, na transparentan način pruži informacije o obradi njihovih ličnih podataka.

Pravila privatnosti se primjenjuju na sve lične podatke koje Ministarstvo prikuplja, upotrebljava ili na drugi način obrađuje, direktno ili putem drugih kontrolora.

Prema Zakonu pojmovi navedeni u nastavku imaju sljedeća značenja:

Lični podatak je svaki podatak koji se odnosi na fizičko lice čiji je identitet utvrđen ili se može utvrditi.

Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatiziranim ili neautomatiziranim sredstvima kao što su: prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prijenosom, širenjem ili stavljanjem na raspolaganje na drugi način, usklađivanje ili kombiniranje, ograničenje, brisanje ili uništavanje.

Kontrolor podataka je fizičko ili pravno lice, javni organ ili nadležni organ koji samostalno ili s drugim određuje svrhe i sredstva obrade ličnih podataka.

Nadležni organ je organ koji je nadležan za sprečavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprečavanje prijetnji javnoj sigurnosti, kao i pravna lica ako su zakonom ovlaštena za obavljanje tih poslova, kao posebna kategorija kontrolora podataka.

2. Podaci o kontroloru podataka

Ministarstvo unutrašnjih poslova Kantona Sarajevo

Adresa: La Benevolencija 16, 71 000 Sarajevo,

Kontakt tel.: +387(0) 33 286-700

e-mail: ministar@mup.ks.gov.ba

komesar@mup.ks.gov.ba

Detaljnije informacije možete pronaći na slijedećoj Internet poveznici: <https://mup.ks.gov.ba>

PODACI O SLUŽBENICIMA ZA ZAŠTITU LIČNIH PODATAKA

Kontakt tel.: +387(0) 33 286-966

+387(0) 33 407-243

e-mail: szlp@mup.ks.gov.ba

szlp.up@mup.ks.gov.ba

3. Pravni osnov i svrha za obradu ličnih podataka

Vaše lične podatke Ministarstvo obrađuje u skladu sa Zakonom, a na osnovu člana 8. Zakona o unutrašnjim poslovima Kantona Sarajevo ("Službene novine Kantona Sarajevo", br. 1/16, 26/19, 31/19, 39/20 i 18/26) izvršavajući svoje nadležnosti i ovlaštenja:

- sprečavanje, otkrivanje i istraga krivičnih djela i prekršaja na području Kantona u skladu sa zakonom;
- poslovi i zadaci koji se odnose na održavanje javnog reda i mira;
- poslovi i zadaci koji se odnose na održavanje javnih okupljanja;
- poslovi sigurnosti, kontrole i regulisanja saobraćaja na putevima Kantona, poslovi kontrole taksi vozila i vozača, te druge poslove sigurnosti u oblasti saobraćaja, utvrđene posebnim zakonom i podzakonskim aktima;
- poslovi izdavanja, poništavanja i zamjene ličnih karata i jedinstvenog matičnog broja građana i vođenja evidencija;
- poslovi izdavanja, poništavanja i zamjene putnih isprava;
- registracija motornih vozila;
- poslovi izdavanja i zamjene vozačkih dozvola;
- poslovi prijavljivanja, odjavljivanja i vođenja evidencije o prebivalištu i boravištu građana;
- ažuriranje i čuvanje matičnih knjiga i nadzor nad primjenom propisa u oblasti matičnih knjiga;
- promjena ličnog imena;
- poslovi koji se odnose na sticanje državljanstva Federacije i promjenu entitetskog državljanstva;
- poslovi inspeksijskog nadzora u oblasti zaštite od požara iz nadležnosti Ministarstva;
- poslovi koji se odnose na rad agencija za zaštitu ljudi i imovine i unutrašnjih zaštitarskih službi i inspeksijski nadzor u navedenoj oblasti;
- drugi poslovi i zadaci stavljeni u nadležnost Ministarstva u skladu sa ovim i drugim zakonima.

4. Vremenski period čuvanja ličnih podataka

Vaše lične podatke Ministarstvo obrađuje u vremenskom periodu koji je potreban da se ispuni svrha njihove obrade. Nakon prestanka svrhe za koju su prikupljeni, podaci se više neće koristiti i čuvat će se shodno Listi kategorija registraturne građe sa rokovima čuvanja u Ministarstvu, koja je donesena u skladu sa Zakonom o arhivskoj djelatnosti i JU Historijskim arhivom Sarajevo.

5. Tehničke i organizacione mjere zaštite ličnih podataka

Vaše lične podatke Ministarstvo obrađuje na način kojim se osigurava odgovarajuća sigurnost i povjerljivost kao i odgovarajuća primjena načela zakonite obrade ličnih podataka, te smanjenje količine ličnih podataka po principu neophodnosti. Ministarstvo poštuje vremenski period čuvanja ličnih podataka kao i njihovu raspoloživost.

Pored drugih mjera, obavezali smo naše zaposlenike na povjerljivost svih podataka koje saznaju u obavljanju posla te radimo na njihovoj edukaciji u cilju podizanja svijesti o zaštiti ličnih podataka.

6. Koja su vaša prava u vezi sa obradom ličnih podataka?

Vaša prava, uz izuzetke propisane zakonom su:

- pravo na pristup ličnim podacima,
- pravo na ispravku ličnih podataka,
- pravo na brisanje ličnih podataka,
- pravo na ograničenje obrade ličnih podataka,
- pravo na prenosivost ličnog podatka,
- pravo na ograničenje obrade,
- pravo na naknadu štete,
- pravo na prigovor.

Za ostvarivanje svojih prava možete se obratiti pisanim putem ili putem elektronske pošte na naprijed navedenu adresu. Ako ste nezadovoljni postupkom Ministarstva, možete se obratiti nadležnom nadzornom tijelu www.azlp.ba ili putem tužbe nadležnom sudu.

7. Prijenos ličnih podataka drugim kontrolorima podataka, prijenos ličnih podataka u inostranstvo

Vaše lične podatke Ministarstvo može dati drugim kontrolorima ukoliko je to potrebno za izvršavanje zakonom propisanih obaveza. Takođe, vaše podatke Ministarstvo neće prenositi drugim kontrolorima u inostranstvu, osim ukoliko takva obrada nije neophodna na osnovu zakona ili međunarodnog ugovora koji obavezuje Ministarstvo.

Vaše lične podatke Ministarstvo daje pružaocima informatičko-komunikacionih usluga sa kojima je zaključilo ugovor i koji poštuju pravila postupanja sa ličnim podacima.

8. Korištenje kolačića (cookies)

Na našoj službenoj internetskoj stranici <https://mup.ks.gov.ba/> koriste se obavezni, odnosno tehnički kolačići (cookies). Ti kolačići su male datoteke koje omogućuju ispravan rad internet mjesta. Iste ne možemo isključiti, te za korištenje takve vrste kolačića ne trebamo vašu saglasnost. Obavezni kolačići ne pohranjuju nikakve informacije koje bi vas mogle identificirati.

9. Promjene pravila privatnosti

Pravila privatnosti se redovno ažuriraju u slučaju eventualnih promjena kako bi bila tačna i transparentna. O svim izmjenama i dopunama bit ćete blagovremeno informisani u skladu sa načelom transparentnosti.